



### **13. Tschanteda dal cussagl cumünel in marculdi, ils 3.7.2013 a las 19.00 in chesa cumünela S-chanf**

**Presidi:** Duri Campell

**Preschaints:** Gian Andrea Bott, Ines Barblan, Gian Fadri Largiadèr, Paolo Bernasconi

**Absaints:**

**Actuar:** Duri Schwenninger

---

#### **Tractandas:**

1. Protocol
2. 0.211 Dumandas da fabrica
3. 3.400 Cuorsa da passlung classic, piglier pusizun regard data da l'occurrentza
4. 8.001 Alp Griatschouls, decisiun d'incumbenzer planisaziun da cultivaziun
5. 3.400 Candidatura per center naziunel da sport d'inviern, decisiun per candidatura
6. 7.900 GEP fasa 3, surder incumbenza
7. 0.210 Bartolini Flora e Miriam, convegna per furmer l'entreda da gascha cun plattas da crap sün terrain cumünel
8. 9.999 Varia

La glista da tractandas vain approveda cun piglier tiers auncha la tractanda surdeda da lavuors sanaziun reservuar Quedras.

**Protocol:** Il protocol da la tschanteda dals 19.06.2013 vain approvo unanimamaing.

#### **100 0.211 Dumanda da fabrica Angelini Vito, refer saiv e mür e nouvs parkegis**

Il cussagl piglia cugnuschentscha da la dumanda da Vito Angelini per refer la saiv e'l mür, zieva las lavuors in connex cul schlargiamaint da l'infrastructura, scu eir per eriger 3 nouvs parkegis sün parcella nr. 127 in Chauntaluf. Il cussagl decida unanimamaing da conceder il permiss da fabrica giavüscho.

**101 0.211 Dumanda da fabrica  
Bartolini Flora e Miriam, nouv tet sur l'access da la garascha  
suotterrauna**

Las duonnas Flora e Miriam Bartolini haun inoltro üna dumanda per eriger ün nouv tet sur l'access da la garascha suotterrauna sün parcella nr. 30 in Somvih. Il cussagl piglia cugnuschentscha da l'acconsentimaint dal proprietari da la parcella 11 regard il fabricher a cunfin. Il cussagl decida unanimamaing da conceder il permiss da fabrica per eriger il nouv tet.

**102 0.211 Dumanda da fabrica  
Widmer Daniel e Remo, müdamaints da fabrica chesa existenta, 1.  
part**

Il cussagl piglia cugnuschentscha da la dumanda da Daniel e Remo Widmer per fer müdamaints da fabrica vi da la chesa sün parcella nr. 22 in Somvih. Ils patrums da fabrica prevezzan d'ingrandir la surfatscha d'abiter cun eriger lucarnas sül tet scu eir d'eriger our da 4 abitaziuns, 1 abitaziun. Il cussagl decida unanimamaing da conceder il permiss cun differentas cundiziuns.

**103 0.211 Dumanda da fabrica  
Salzgeber Joos Simon, colliaziun lingia dal s-chudamaint a  
distanza traunter l'ustaria Staila e la chesa Baader**

Joos Simon Salzgeber ho inoltro la dumanda per eriger il colliamaint da la lingia dal s-chudamaint a distanza traunter l'ustaria da la Staila e la chesa Baader sün parcella nr. 41 in Funtauna. Il cussagl decida unanimamaing da conceder il permiss giavüscho.

**104 0.211 Dumanda da fabrica  
Erret mür illa nouva stalla da chavals, sainza permiss**

La cumischiun da fabrica ho constatato chi saja gnieu erret ün mür sainza permiss illa nouva stalla da chavals. In seguit s'ho mno tres üna visita al lö cun la planisedra da l'uffizi per il svilup dal territori chantunel. Il cussagl piglia cugnuschentscha da la notizcha d'acta. L'uffizi propuona da pretender dals patrums da fabrica da fabricher inavous i'l stedi leghel, siand ch'ün permiss zievatiers pel mür nu po gnir miss in vista. Il cussagl decida cun 4 cunter 0 vuschs da pretender da fabricher inavous i'l stedi leghel e d'introdür la procedura da multa tenor l'artichel 61 da l'ordianziun davart la planisaziun dal territori Grischun (OPTGR).

**105 0.211 Dumanda da fabrica  
Campell Duri, orientaziun muntascha d'üna tenda d'indians**

Il cussagl piglia cugnuschentscha da l'orientaziun da fabrica da Duri Campell, regard l'intent da munter üna tenda d'indians (Tipi Zelt) sün parcella nr. 373 a Chapella. Il cussagl nun ho üngünas objecziuns.

**106 3.400 Sport  
Cuorsa da passlung classic, piglier pusiziun regard data da  
l'occorrenza**

Il sport da passlung classic vain vi e pü darcho attractiv e differentas regiuns organiseschan cuorsas da passlung classicas. Sün iniziativa da privats es naschida l'ideja, e'ls presidents cumünels da las vschinaunchas da La Plaiv haun sustgnieu quella da spordscher eir in Engiadin'Ota üna simila cuorsa, cun la cundiziun da mner tres la cuorsa düraunt il mais schner per generer pernottaziuns in ün temp da stagiun bassa. In seguit s'ho contacto our da motifs logistics ils respunsabels dal maraton Engiadinais. Quels haun comunicho, ch'els sun prontos da sustegner la cuorsa da passlung classic, scha quella vain mneda tres aunz il maraton in marz. Zieva cuorta discussiun decid'il

cussagl unanimamaing da mner tres d'uraunt il mais schner la cuorsa. Il cussagl füss però cuntaint, scha'ls organisatuors dal maraton as decidessan da fer part eir a la cuorsa in schner.

**107 8.001 Alps e pasculs**  
**Alp Griatschouls, decisiun d'incumbenzer planisaziun da cultivaziun**

As referind sün la decisiun dal cussagl dals 16 november 2011 e la sentenzcha dal güdisch administrativ dals 11 december 2012 regard la pasculaziun da la bes-cha Engiadinaisa pretenda uossa l'uffizi chantunel d'agricultura e geoinformaziuns, chi dess gnir surlavuro la planisaziun da la cultivaziun da l'alp Griatschouls e chi stu gnir defino nouv ils differents pasculs. Per quel motiv es gnieu trat aint ün'offerta da basa, però intaunt nu cuosta la lavur a nosa vschinauncha ünguotta. Quella vain subvenziuneda dal chantun, la decisiun es però auncha pendent. Siand cha la lavur stu uossa gnir piglieda per mauns, decid'il cussagl d'incumbenzer al Plantahof da fer la planisaziun da cultivaziun da l'alp Griatschouls.

**108 3.400 Sport**  
**Candidatura per proget center naziunel da sport d'inviern, declaraziun d'intent**

L'ideja per realiser ün center naziunel da sport d'inviern es gnida in connex cun discussiuns intuorn la promoziun dal sport da naiv e l'importanza da la Svizra scu destinaziun da sport e turissem. Per fer evaluaziuns per lös pussibels sun gniesu invidos ils chantuns d'inoltrer dossiers da candidatura. Ils dossiers vegnan examinados e valütos d'ün team d'experts. In seguit s'ho sclariu cun l'Armasuisse, scha füss insomma pussibel e d'inoltrer per l'areel militer da S-chanf la candidatura. Ils responsabels da l'Armasuisse sun perinclets cun l'agir ed haun cunfermo que in scrit. Il cussagl decida unanimamaing d'inoltrer in collavuraziun cun la destinaziun Engiadina San Murezzan, cun la vschinauncha da San Murezzan e cul circol d'Engiadin'Ota üna declaraziun d'intent. La candidatura dess gnir coordinada ed elavureda dal sviluppeder regiunel in stretta collavuraziun cul secreteriat da sport da la vschinauncha da San Murezzan.

**109 7.100 Chanalisaziun/sarinera**  
**GEP fasa 3, surder incumbenza**

Las fasas 1 e 2 dal plan da drenascha (GEP) sun glivredas. La fasa 3 d'eira gnida offrada tenor stima da cuosts. Uossa sun avauntmaun ils cuosts effectivs. La fasa 3 cumpiglia las seguaintas lavuors da preproget: Mantegnimaunt (cunagir, controllas/inspecziuns, elavurer ün plan da mantegnimaunt), reparaturas e sanaziuns (calculaziun approximativa da las investiziuns), eriger üna documentaziun da proget (rapport e plan) da la rait da drenascha scu eir las tschantedas cun nosa vschinauncha e l'uffizi chantunel. Il cussagl decida unanimamaing da surder a la firma Edy Toscano SA eir la fasa 3 pel predscha da fr. 11'170.00.

**110 0.210 Contrats e cunvegns**  
**Bartolini Flora e Miriam, cunvegna per furmer l'entreda da garascha cun plattas da crap sün terrain cumünel**

L'an passo haun Flora e Miriam Bartolini inoltro üna dumanda per pudair cumprer 93 m<sup>2</sup> terrain cumünel d'avant l'entreda da garascha in Somvih, per pudair furmer l'entreda cun crappa natürela. Il cussagl vaiva decis da na vender pel mumaint üngün terrain e da regler la chosa cun üna cunvegna. Uossa es avauntmaun il sböz da la cunvegna e'l cussagl fo üna lectüra da quel e decida unanimamaing d'accepter il contrat culs seguaints müdamaints:

L'artichel 1 dess gnir stricho. Il temp da desditta da 12 mais dess gnir müdo sün ün temp da desditta da 6 mais.

**111 7.000 Provedimaint d'ova  
Sanaziun reservuar Quedras, surdeda da las lavuors d'impressari**

Per fer la lavur regard la sanaziun dal reservuar Quedras s'ho trat aint offertas per las lavuors d'impressari. Il cussagl piglia cugnuschentscha da 3 offertas chi sun entredas e decida unanimamaing da surder la lavur a la firma Angelini SA da S-chanf per l'import offert da fr. 120'657.60. Tar la surdeda s'ho resguardo l'offerta la pü favuraivla tenor ledscha da submitsiun.

**112 9.999 Varia**

Da quista tractanda nu vain fat adöver.

A las 22.05 vain la tschanteda alveda.

In buna fè

L'actuar:  
***D. Schwenninger***